



Jannik Sinner-i Wimbledon Title benogo

State jenjang atema US Tir dang asüngdangtsü asü?: Omar Abdullah



VOL. XXIII ISSUE NO. 271 (ADOK 271) DIMAPUR SANGTENNÜ (TUESDAY) CHITENI (JULY) 14, 2026

₹ 5.00

Assam Rifles-i Havildar Mohammad Iqbal tushir

Guwahati, July 13, 2026 (Agencies): July 13, 2026 nü Nagaland kübok Chumoukedima district nung improvised explosive device (IED) amshia amakdang Assam Rifles personnel sepai kati taküm bendanga agütsüba atema tetushi agütsüogo.

AR sepai ya Havildar Mohammad Iqbal ta jangjaogo aser Director General Assam Rifles Lieutenant General Vikas Lakhera, AVSM, SM-i anir

züngsem ajaki asür kibong den mangyimba osang lemsatepogo. "Lt Gen Vikas Lakhera, AVSM, SM, Director General Assam Rifles aser Assam Rifles sepai ajaki Hav Mohd Iqbal nem tetushi agütsü. Tanü Nagaland nung pai pa taküm bendanga agütsüogo aser ozü tasütait sepai kibong den asükhu lemsateper. Onoki par kibong den külemi noktaker" ta Assam Rifles-i sangdong ka nung metetdaksüogo.

Nagaland-ia one-day State Mourning agiogo

Dimapur, July 13, 2026 (TYO): July 12, 2026 nü Qatar nung Amir tebu His Highness Sheikh Hamad bin Khalifa Al-Thani asüba tenüng nung India sorkari July 13 nü one-day State

Mourning ayongzükba nung Nagaland-ia shilem agiogo.

Iba mapang Nagaland kübok kiojen ajak nung National Flag tom nung ayu aser official entertainment kecha maliasü.

Leimakhong nung security akangshiogo; Naga nunger tepseter talila aputsü: Home Minister

Imphal, July 13, 2026 (Agencies): Leimakhong nung Meitei nunger ki asem rongdoktsüba sülen security akangshiogo ta Home Minister Konthoujam Govindas-i Hombarnü metetdaksü.

Külen, taoba ita tasü mang anguba Naga nunger trok tepsetba atema bushisüngdanga arudar aser iba dak sendakba nung nisung talila aputsü imlar ta Govindas-isa ashi.

Deobar nikongdang high-level review senden ka amendang

security akangshitsü telemtetba agia liasü ta pai osangbener dang ashi.

Leimakhong nung Central Reserve Police Force (CRPF) aser state security forces mapa lezmükja lir aser ano sepai talila yokogo ta Govindas-isa ashi.

Leilon Vaiphei village nung Naga nunger trok tepsetba ken o atema temulung melemi bilemer nisung ana pua lir aser taruba anogo ana tsüngda ano talila aputsü ta Home Minister-isa shisem.

Northeast nung küm 10 tsüngda connectivity, science infrastructure renlokogo: Jitendra Singh

Shillong, July 13, 2026 (Agencies): Northeast nung tesüba küm ter tsüngda connectivity, scientific infrastructure aser development kanga renlokogo aser linük tejakleni aoba nung Northeast sendaktepa lir ta Union Minister of State for Science and Technology Jitendra Singh-i ashi.

Shillong nung aliba North East Centre for Technology Application and Reach (NECTAR) nung science and technology rejutem meyipa repringshiba senden ka amenba sülen Jitendra Singh-i iba osang metetdaksü.

Tesüba nung railway tesentaktep maliba state tem rail networks ajanga sendaktepogo, airports tasen yangluogo aser gari lenmang tajungba kümogo ta paia ashi.

"Northeast nung scientific infrastructure repringdangra 2014 matongdang weather radars 2 liasü saka tangbo 13 kümogo aser Mission Mausam kübok ano

aika yanglutsü sentong lir. Northeast nung seismological observatories aser monitoring stations 80 shi aliba tangbo 170 kümogo aser iba ajanga earthquake surveillance aser disaster preparedness maparen akangshiogo" ta Union MoS Jitendra-isa shisem.

Northeast lanurtemi aviation, tourism, healthcare aser nursing wadang balala nung shilem tajung agir. Tawa Japan nung nurse inyaksü nisungtem shimogo aser parnok teimbaka Northeast nungi aser talisa Meghalaya nungi lir ta paia metetdaksü.

Prime Minister Narendra Modi-i Northeast nung temulung kanga agütsüba ajanga renloker. Pai 80 ben jungnüa Northeast semdangogo ta Jitendra-isa ashi.

Maneni Northeast nung telecommunications aser digital connectivity kanga agi tajungba kümogo aser iba ajanga Northeast-i linük den tajungba sendaktepogo ta paia metetdaksü.

Chümoukedima district nung Assam Rifles jawan ka pokset; 4 yiru



Dimapur, July 13, 2026 (TYO): Hombar nikongdang 2:00 ako meta Chümoukedima (A) village-Shokhuvi road nung IED apokba lendong ka nung Assam Rifles jawan ka asü aser pezü kanga mejungi yirua lir.

Iba lendong nung yirurtem ya Christian Institute of Health Sciences and Research (CIHSR)-i anir ao.

AR sepaitem ya Mahindra Bolero pickup truck nung ka nung mener arudang autorickshaw ka nung bomb enoka aliba pokdaksü ta ketdangsürtemi ashi.

Iba osang zülü tashi nung telok shingia iba tatalokba atema tenüng agiba mali aser sepaitemi bushisüngdang tenzükogo.

CM Rio & Governor Yadav

nati aitsür

Chief Minister Neiphiu Rio-i

iba tatalokba aitsüogo. "Iba ya lapi mapa ka lir aser asen loktiliba den khenyongi meputep. Iba mapa inyaktertem maitsü jangjatsü aser temeten agütsütsü. Ibala inyakyim ajanga asen nübor nem timtem bentsür marudaksütsü" ta CM Rio-i ashi.

Nagaland Governor Nand Kishore Yadav-ia Chümoukedima district nung Assam Rifles personnel ka asüba atema mangyimba metetdaksüogo.

Governor-i asür kibong, medemertem aser temeimertem den asükhu lemsatepogo. Paisa iba lendong nung yirua alirtem tekaraba nung taneptsü angutsü moatsüogo.

Governor Yadav-isa iba tatalokba khukhua aitsüogo aser bangdakpurtemi jungjunga bushisüngdang aibelenertem merenshitsü tamang akaba

metetdaksüogo.


Assam Rifles aser security forces ajaki Nagaland nung yimjung, security aser tensa süngjema ayutsü inyakba pusema nungiter ta Governor-isa shisem.

Chümoukedima district kübok Sukhovi anasa IED amshia Assam Rifles convoy amakdang tasütait Assam Rifles jawan ka asüba aser aika yirutsüba khukhua aitsür ta Bharatiya Janata Party, Nagaland-ia sangdong ka nung metetdaksüogo.

Onoki asür kibong den asükhu lemsateper aser yirua alir ajak tekaraba nung taneptsü angutsü sarasademtsür. Kanga dang mebilemdangi inyakba mapa ya yimjung aser security anema lir. Asen linük aser nübortem kümzüka ayutsü atema anibelem arema inyakba security forces dak iba amai lapi inyakyim amshia amakba ya magizüker aser ajaki aitsütsüla ta Media Cell, BJP Nagaland-ia sangdong nung ashi.

Nagaland nung alirtem süngjemtsüla, longjemtsüka aser kümküma atatsüla aser security agencies den amalitepa parnok teinyaksü inyaka odaksütsüla. Asenok ajaki yimjung, putepa alitsü aser ozüng sülen anidaksü tenangzükba agishitsüla ta Media Cell-isa metetdaksüogo.

MP Supongmeren mendenbuba sür Mokokchung DISHA senden amen



Mokokchung, 13th July (TYO): Lok Sabha MP S. Supongmeren Jamir-i ketdangsüa 13th July nü Mokokchung district asoshi District Development and Monitoring Committee (DISHA) senden yangi Mokokchung D.C conference hall nung takok ngua kaogo.

Senden nung central sarkar sentong balala, departmental inyakyim aser terenlok mapatem indang maparen repringshia liasü, iba den külemi district nung mapatong balala inyakba dak sentakba onüktem benoka tatsü talang aika asadanga jembi.

Supongmeren-i jembidang, sarkar mapatongtem takok/ tamakok anguba, mesüra itemji inyakdang tsükdakradang ajuruba mesüra item tebilemtsü anema kechi inyak nung ajungtsü ta asadanga inyakba den terenlok mapa balala jagi shitakba nüngdakba pur atonger matonger ta asübaji kanga tongtibang lir, ta metetdaksü.

MP-isa Mokokchung nung tang rongdak nüngdak ka lemsatepdang, Mokokchung nung mozülar-tem anepalua amungdak tesem kata mali, anungi, iba atema sarkar dang

asüngdanga zülutsü tebilemba ka benok aser teloki ibaji junger ta agizüka liasü. Supongmeren-isa ATMA Mokokchung-i züluba kaketnu (booklet) ka sayatsü.

Senden nung Mokokchung district nungi Agricultural Technology Management Agency (ATMA), Agri department, Horticulture department, Soil and Water Conservation, A.H and Veterinary Services aser BSNL Mokokchung Division nungi ketdangsürtemi PowerPoint Presentation bener arua telok den lemsatep aser onük balala nung sensaksema liasü.

SASCI 2026-27 inyakyim asadanga Chümoukedima nung senden amen



Nagaland nung Nagaland nung Livestock Sector Reforms kübok Special Assistance to States for Capital Investment (SASCI) 2026-27 inyakyim asadangsü senden ka Zone Niathu, Chümoukedima nung amending Adviser Jagat Hazarika-i ketdangsür den jembiba noksa nung angur.

Dimapur, Chiteni/July 13 (TYO): Nagaland nung Livestock Sector Reforms kübok Special Assistance to States for Capital Investment (SASCI) 2026-27 inyakyim asadangsü senden ka Zone Niathu, Chümoukedima nung July 11, 2026 nü mena liasü. Iba senden ya Animal Husbandry Statistics Division, Department of Animal Husbandry and Dairying, Ministry of Fisheries, Animal Husbandry and Dairying, Government of India ajanga Department of Animal Husbandry and Veterinary Services, Nagaland den lungjemer ayongzüka liasü.

Senden tenzüka Director, Animal Husbandry and Veterinary Services, Nagaland, Dr. Kuokehebi Gwirie-i Ministry nungi ketdangsür temi state semdangba asoshi pelaba lemsatop aser maneni yaritsü ayongzüka liasü.

Department ya 1964 küm amenoker küm aika senotsü teyari peria meliaka mapa shidak inyaka aru, ta pai ashi. SASCI ya kanga junga yangluba teyari ka lir aser inyaksü telatet aser mapang tejangja agüja aliba yong mapa shidak ochishia inyaker, ta ashi.

Iba senden ajanga ketdangsür temi pei mapa tejangjaba meteta nübur ajangzüksü asoshi tali tajungba nung inyaksü imlar, ta pai ashi.

Adviser (STATS/NDLM/SASCI), Department of Animal Husbandry and Dairying, Government of India, Jagat Hazarika-i iba senden nung jembidang, Nagaland nung SASCI 2026-27 amshiba

reprangshitsü aser State-i timtem ajurubatem angatettsü asoshi parnok aru, ta ashi.

Rongsenketzüing nung livestock sector-i teyari agütsüba ajiteta Department of Expenditure, Ministry of Finance, Government of India ajanga state ajunga asoshi SASCI 2026-27 kübok sen 3,000 crore lemsüksü, ta pai metetdaksü.

Livestock sector nung ajemdaker states tem categories pezü lemsatsü aser Nagaland ya Category D nung lir, ta Hazarika-i ashi.

Iba scheme yagi States nem criteria nung aliba ama inyaksü asoshi inyakba nung ajemdaker senotsü teyari agütsür. Teyari ya capital investment den sendaka lir aser yangji long-term loans aser eligible capital expenditure dena lir, anungji senden nung adener temi State indang rakpoka jembitsüla, aser ibaji ajanga asangsang nung lenmang bushitettsü, ta pai ashi.

Secretary to the Government of Nagaland, Animal Husbandry and Veterinary Services, Angelina Tajen, IAS-i iba senden nung jembidangm Nagaland rongsenketzüing asoshi livestock sector ya tongtipang tongshi ka lir aser SASCI aser National Digital Livestock Mission (NDLM) kübok inyakba ajak agi livestock metsürtem ajangzüker, ta ashi.

State nung SASCI mapa tashi ita inyaksü atema department-i district 17 reprangtsü asoshi Joint Directors 10 shima lir ta lai metetdaksü.

Lisa majungba, connectivity

majungba, tzüingsang mopung majungba, OTP-based portal updates, livestock insurance issues aser dairy sector nung peria maliba densema iba scheme mapa kuma inyakba mapang timtem balala ajuruba indang Tajen-i lemsatapa liasü.

Timtem tulutibaji mapang shidak nung senotong merenemtetba ya lir, anungji ketdangsür tem mission mode nung külemi inyaksü nungdaker, ta lai ashi.

Lai ano Ministry dang piggery sector nunga yaritsü atema bilemdangsü ayongzüka liasü aser Nagaland nung ak metsüba ya sobaliba aser rongsenketzüing den kanga junga sendaktepa lir ta ashi.

Lai Nagal aser Tenyivo ama state nung anguba ak metsü ajungkettsü indang jembiba aser biosecurity atema teyari meshi aser African Swine Fever Control Programme (ASCAD) kübok restocking aser compensation reprangshitsü ayongzüka liasü.

Senden nung Sunil Kumar, Senior Statistical Officer (AHS Division), DAHD, Government of India aser Dr. Chubasangla, Joint Director and State Nodal Officer (NDLM), Animal Husbandry and Veterinary Services, Nagaland nati SASCI aser National Digital Livestock Mission (NDLM) indang technical presentations agütsü.

Dr. H. Inato Jimomi, Joint Director, AH&VS ajanga Smart Livestock Farming Project, Vision 2047 indang PowerPoint presentation ka agüja liasü.

DC Chümoukedima-i NH-329A Right of Way atema metetdaksür

Dimapur, Chiteni/July 13 (TYO): Office of the Deputy Commissioner, Chümoukedima ajanga sangdong ka agütsüba nung NH-329A (Pimla Junction-Mhainamtsi stretch) indang Right of Way (RoW) küboki aitba ali kiburtem dang 'claims and objections' meshia liasü.

Iba sangdong ya Gauhati High Court, Kohima Bench ajanga totuyuba agütsüba ama inyaker alitsü. Court-i Deputy Commissioner dang iba highway indang Right of Way nung aitba ali kiburtem jangjatepa mangatettep aliba mesüra temeshitsü jangjatepsü, ali kiburtem nungi 'undertakings' meshitsü aser item inyakba osang Court nem agütsütsü totuyuba agüja lir.

Anungji Chümoukedima district kübok Pimla Junction

nungi Mhainamtsi tashi NH-329A alignment nung aliba ali kiburtem dang parnok taginüba mesüra tai apuba lira iba sangdong adoker anogo 30 tsünga Office of the Deputy Commissioner nem agütsütsüla, ta ashi.

Kibur temi pei tenüng, address aser contact tejangja, ali indang tejangja aser tesem, taginüba yimya, item yariba documents, aser tarutsü nung Right of Way küboki aitba tesem nung taginüba lira, itemji tejangja zülur agütsütsüla.

District administration-i ali kibur ajak dang mapang shidak nung documents agütsütsü ajungshir. Iba dak tali osang tejangjaba metetner temi office mapang Office of the Deputy Commissioner, Chümoukedima den tongtepratepsü akok, ta sangdong ajanga ashi.

212buba Bhanu Jayanti sentong aka



Mokokchung nung Gorkha Students' Union, Mokokchung-i (GSUM) ayongzüka 212buba Bhanu Jayanti sentong nung sobaliba tsüingsang ken nung telok kati shilem agiba mapang tangokba noksa.

Mokokchung, Chiteni/July 10(TYO): Tanü Mokokchung nung Gorkha Students' Union, Mokokchung-i (GSUM) ayongzüka 212th Bhanu Jayanti sentong Wb.Atsungba Walling, Additional Deputy Commissioner and Chief Executive Officer, Mokokchung Municipal Council tetushi tejaoker aser Wb. Ganesh Rai, Managing Director of Lotus English

Boarding School, Dharan, Nepal mejeta tejaoker ama jaoka kanga dang meraketa mongogo.

Iba sentong nung Mokokchung telongtet nung alir Gorkha nüburtem adenshia tanga mapang dang nungi kanga agi mera taketba nung mongogo.

Kasa sentong nungsa HSLC ,HSSLC toppers aser literary tetoktepba nung takok angurtem tushia senpet agüja liasü.

Noklak nung skill development sentong ayongzüker

Dimapur, Chiteni/July 13 (TYO): Sankalp-District Hub for Empowerment of Women (DHEW) Noklak ajanga Beti Bachao Beti Padhao (BBBP) kübok Crochet yangluba indang skill development program ka July 20 & 21, 2026 anogotem ayongzüksü lir, ta sangdong ka ajanga metetdaksü.

Iba sentong nung shilem agitsü jangra aliba nisung temi Sankalp - District Hub for Empowerment (DHEW) Noklak nungi form meshitsü akok aser osang tejangjaba

metetner temi mobile number 9863164705/7085964009 nung tongtepratepsü akok, ta sangdong nung ashi.

Iba training ya angati asütsü aser school züingtur anener aser mapa maliba tetsürtem asoshi alitsü. Menden nisung 20 atema dang lir aser registration ya July 13 nungi 17, 2026 tashi alitsü. BBBP kübok taoba mapang ayongzüka skill development training nung shilem magir nem mezüng maongka agütsütsü, ta sangdong ajangasa ashi.

Ungma nung vermicompost units 35 yanglu



Dimapur, Chiteni/July 13 (TYO): Libajen nung timtem magütsü alu ayimba tali tajungba kumdaksütsü asoshi National Bank for Agriculture and Rural Development (NABARD) ajanga senotsü teyari agüja CSLDP 2025-26 kübok Ungma yimdak Department of Soil & Water Conservation, Mokokchung ajanga vermicompost structures unit 35 yanglua liasü.

Iba inyakyim nung shilem ka

ama vermiculture indang awareness sentong ka DSCO Conference Hall nung July 11, 2026 nü teshimtet beneficiaries asoshi agia vermicompost amshitsü yimyatam sayua liasü.

Iba sülen mozü mamshi ali temu yanglu tenzüksü atema sentong nung adener nem quality tajung vermi mesen lema agüja liasü.

Farm Yard Manure (FYM) mesüra tanga organic-enriching

properties dang nungi vermicompost ya kanga agi tajungba lir ta mongin temi ashir. Iba yagi soil health tajungba kumdaksü, tsünütsü timba adokdaksür aser moisture tajungba nung soita ayur.

Region nung aluyimer tem dang eco-friendly farming aser libajen meraksar alu nungi chiyongtsü tajungba aser timba züsentettsü asoshi vermiculture yimya amshitsü ayongzüka liasü.

Mon DPDB senden July 16 nü amentsü

Dimapur, Chiteni/July 13 (TYO): Deputy Commissioner & Vice Chairman, DPDB Mon, Wennyei Konyak, NCS ajanga sangdong ka nung, July 2026 atema District Planning & Development Board senden July 16, 2026 anüngdang 11:30

ako nungi tenzüka Deputy Commissioner, Mon indang Conference Hall nung amentsü, ta metetdaksüogo.

Züingsem ajaki iba senden nung arua shilem agitsü ayongzüker, ta sangdong ajangasa ashi.

SC-i UP sorkari tentetba SIT aser Temple Trust dang report meshir

New Delhi, July 13 (Agencies): Supreme Court-i Uttar Pradesh state sorkari tentetba Special Investigation Team (SIT) dang Ayodhya nung Ram tekülem ki tenla auyaba dak sendakba report agüjang ta tuyuogo.

Supreme Court-isa Ram Janmabhoomi Teerth Kshetra Trust danga iba dak sendakba report agüjang, ta tuyuogo.

Supreme Court-i, "Onoki Uttar Pradesh sorkari tentetba SIT dang report agüjang ta tuyur. Iba ken o ya taruba Hombarnü angadangtsü. Report nungjisa SIT nung züngsemtem metetdakjang," ta metetdaksü.

Ram tekülem kidang tenla auyaba dak sendakba nung forensic audit ka agitsü aser Comptroller and Auditor General (CAG) nem Trust indang accounts reprangshidaksütsü atema court nung temepishiba ken otem benoka lir.

Temepishiba ken o agütsürtemi Uttar Pradesh sorkari tentetba Special Investigation Team (SIT)-i bushisüngdangbaji ashishir, kechiyong FIR mebenoki bushisüngdang tenzük aser iba ya SIT-i masü saka independent agency kati bushisüngdangtsüla, ta metetdaksü.

Iba ken o dak sendakba nung nisung 8 bo puogo aser SIT-i maneni bushisüngdangdar.

Ano külen tanga osang ka nung, Hombarnü Faizabad Bar Association nung lawyer temisa, Ram tekülem ki tenla auyaba dak sendakba ken o nung court dang taoba mapang Shri Ram Janmabhoomi Teerth Kshetra Trust nung general secretary inyaksang, Champat Rai den taoba mapang trust züngsemtem- Anil Mishra aser Gopal Rao nung anema FIR benokang ta mepishitsü, ta metetdaksü.

Bar association lawyers-i, parnoki July 2 nü Ram

Janmabhoomi police station nung ken o agütsü, ajisüaka tai tonglokja alirtem anema FIR benoktsü police-i memelung, ta metetdaksü.

Faizabad Bar Association nungi Aftab Khan-i, "Hopta ana tejaklen onoki police ajurua Rai, Mishra aser Rao anema FIR benoktsü mepishia liasü. Tanü (Hombarnü) Faizabad Bar Association nungi telok kati FIR dak sendakba nung police station jagi ao. Yangji Police ketdangsertemi onok dang FIR mebenok, ajisüaka parnoki ibaji temaba ketdangsertem matsüngdang benokogo ta ashi," ta metetdaksü.

Faizabad Bar Association-isa Ram tekülem ki tenla auyaba nung tai tonglokja alirtem atema ken o mejembitsütsü telemetba agiogo aser züngsem kari danga tai tonglokja alirtem atema ken o jembitsüra senchi lakh 5 achitsü aser association nungi anentsütsü.

HC-i nashi tepsettsü nokdanga tetuyuba agütsüba SC-i agientsür

New Delhi, Chiteni/July 13 (Agencies): Madras High Court-i Tamil Nadu tesem ajaklen Bakrid mapang mesüra tanga mapang ajak nung nashi metepsettsü tetuyuba agütsü, ajisüaka Supreme Court-i iba tenokdangbaji agientsüogo.

Hombarnü (July 13, 2026) Justice Vikram Nath aser Justice Sandeep Mehta nati akümba bench-i Tamil Nadu state sorkari High Court obendang anema agütsüba Special Leave Petition (SLP) ji agizükogo.

Madras High Court tetuyuba nung tatembanglen 'state tesem ajaklen nashi tepsetba nokdangtsü' tuyua lir, aser ibaji metongshitsü nüngdak, ta bench-i metetdaksü.

High Court obendang anema Tamil Nadu sorkari counsel, Jayashree Narasimhan ajanga SC nung ken o benoka liasü.

High Court obendang ya Tamil Nadu Animal Preservation Act, 1958

anema lir, kechiyong iba ozüng kübok mapa inyaksü metemsüba nashi mesüra techanu mepotsü metemsüba küm 10 dak tali nashibo tepsettsü melar, ta state sorkari metetdakja liasü.

State sorkarisa, tanga ozüngtem nunga shiruru tepsetba khenyongi nokdangba mali, aser item rongnung Prevention of Cruelty to Animals Act, 1960, Prevention of Cruelty to Animals (Slaughter House) Rules, 2001, Tamil Nadu Urban Local Bodies Act, 1998 aser Tamil Nadu Urban Local Bodies Rules, 2023 densema lir, ta metetdakja liasü.

Bakrid benjung jakdang anogo ka jelia May 27 nü Madras High Court bench of Justice GR Swaminathan aser Justice V Lakshminarayan nati Hindu Makkal Katchi General Secretary, K Surya Prasanth-i benokba ken o ka angadangba sülen state tesem ajaklen nashi tepsetba tenokdangba metetdakja liasü.

State jenjang atema US Tir dang asüngdangtsü asü?: Omar Abdullah

Srinagar/Jammu, July 13 (Agencies): Jammu & Kashmir nem state jenjang magütsüba atema Centre sorkar maneni aija Hombarnü Chief Minister, Omar Abdullah-i, J&K nem state jenjang agütsütsü atema pai US Tir Donald Trump ajurutsü asü?, ta asüngdang.

BJP lenirtemi, J&K nung, assembly nung aser Parliament kima longkak aibaji amajok dang asütsü, ta ashiba sülen Jammu nung lokti senden ka nung jembidang Chief Minister, Omar Abdullah-i, "Onoki joko maremzükteter. Mezüngbuba nung parnoki, assembly nung benokba ajanga state jenjang mangutsü ta ashi, iba sülen J&K nung longkak aibaji ajanga state jenjang mangutsü ta ashi. Tang parnoki, onoki Jantar Mantar nung longkak aibaji agia state jenjang mangutsü ta ashir. J&K atema state jenjang bushia ni White House-i oa Donald Trump ajurutsüla asü?" ta asüngdang.

July 20 nü Parliament senden tenzükba anogo nung National Conference-i New Delhi nung aliba Jantar Mantar nung longkak aittsü, kechiyong assembly election agiba sülen state jenjang atema küm ana jungnüa atar, ta pai metetdaksü.

Tamalen Katra nung Ato kilonser Narendra Modi-i J&K dang state jenjang nangzükba metetdakja Omar-i, "Iba ya Modi-i nangzükba süra ibaji akhümtsübuttsüla," ta ashi.

Omar-isa, J&K nem tanaben state jenjang magütsü tashi National Conference party-i democratic inyakyim ajak beshia takhangba agütsütsü, ta ashi.

Paisa, Parliament kima longkak aibaji asen linük nung nangzükba ka atangji ataloktsü nükjidong nung dang lir, ta metetdaksü.



July 13, 2026 nü Jharkhand nung Khunti district kübok Savmarangbeda yimdak mashisa tetsür ka ayong adena hospital-i anir aodang tangokba noksa nung angur.

“ Our government is committed to the development of a generous and comprehensive social security mechanism for all workers. ”

Narendra Modi
Prime Minister

Strengthening Healthcare for Workforce Across the Nation

Inauguration of

New OPD Block, ESIC Hospital, Sanathnagar, Telangana and

Virtual Inauguration of

100 Bedded ESIC Hospital, Sriperumbudur, Tamil Nadu

100 Bedded ESIC Hospital, Rajamahendravaram, Andhra Pradesh

Upgraded 200 Bedded ESIC Hospital, Beltola, Guwahati, Assam

ESI Dispensary and Branch Office, Kota, Rajasthan

ESI Dispensary, Bhawanimandi, Rajasthan

ESI Dispensary and Branch Office, Surendranagar, Gujarat

By

Dr. Mansukh Mandaviya

Minister of Labour & Employment and Youth Affairs & Sports, Government of India

Tuesday, 14th July, 2026 | ESIC Hospital, Sanathnagar, Telangana

Project Benefits

Benefitting around 53 Lakh Beneficiaries

Cashless Medical facility without any Upper Limit

Quality Healthcare Services near Homes

Healthcare Services with Modern Medical Equipment

Cash Benefits & Primary Healthcare Under One Roof at ESI Dispensaries & Branch Offices

For more details visit: <https://www.esic.gov.in/> or Call on toll-free number 1800-11-2526

Scan QR Code To watch Live Event



TIR YIMYIM YIMOBILEM (EDITRIAL)

DIMAPUR TUESDAY, JULY (CHITENI) 14, 2026

Electric light-bosa agütsütettsüla

Tanü putu nung electric light ya tesangwa atema dang masü saka electric tashi meliibo asenok taküma junga melitettsüsa tzü aser mopong amai dang kümogo. Aji oda, light agidang tzü atsüteta agir, soruchioker aser nüngdak mapa ajak inyaker. Ajioda, light mali nungbo nsung aika mapa maka akümtsü, kechiyong light agidang mapa ajak inyaker. Iba ama putu ka nung asenok Nagaland nung alirtembo, ano tsürabur mapang amato, amang nung tesangwa asoshia shimo milen aser kerosene agi atsükba milen, lantern, amala amshitsüsa kümogo. Atangji, asen lima nung, talisa Dimapur nung, tang ama tatsük mapang light maruba agi shimo milen aser lantern amshitsü sa kümogo ta asübaji takartemibo mangatettsüa akok, kechiyong takartem asoshibo power department-i light magütsütetaka, generator aser solar power nungi peria angutsü. Ajisüaka, koba lima nung südirsüaka, nübortem ket nung akaba rongsen aser parnok pelaa aliba jenjangji tulur takartem koma alir ta asüba nung masü saka sensaker aser tilartem agi sünga aliba nütsüng nübortem taküm aser kibong tia repranga asadanger. Ibaji kodang bilemdangdir, Nagaland nung light maruba mapang temelen amshitsüsa generator aser solar power kibong kwika nungbo alitsü ? Ibaji bilemdanga, government nung alirtemi nütsüng nübortem shinga electric light agi timmatemtsüsa 'power generation' sentong tajung atongteta inyaksüla. Atangji, tesasatsükaji, Dikhu ayong nungi light atsüteta agitsü asoshi ali kiburtemi memulungba ajanga sen aser nübo aika endoka asameyanger meinyaktet mapa anenba osang angashiogo. Iba amaji, government-i asen lima nungi asen peria bo electric light agiteta agitsüsa sentong yangluaka, asenok ali kiburtemi memulungra, tanga lenmang mali, tang amai tangar state dang nungi alia agitsüsa akümtsü. Ibaji angateta, electric tashi agitettettsüsa ayong alir ali kiburtemi temenok dalang agir amshitsü melatsüla. Ano, tongtibang kaji, government-ia tang anguba electric tashi agi nübortem nüngdakbosa peridakja amshitsü asoshi transformer nungi shir electric yindong aser yinzü ajak mapang shitak shitak nung anepalua anidaksüla. Talisa, tang ama tatsük mapang light oadokba ya transformer raksaba nungi adoker aser ibaji kodang reprangdangdir transformer-ji takong kümer tatsük metizüktet apokba puteter. Atangji, nübortemia light apayua atsüktsüla aser nüboremi light apayua atsüktsü atema power department-ia light billing mapa shitak inyaksüla. Aji oda, tangbo asenoki asenok peria electric tashi madokdaksüteter aser tangar dang alia agiba maparen nunga junga anepalu mesüteter ta asenok light maruba agi alima amangba amai asenok dak tangatetba maliba agi asenok tokolok shisatsüa tammang tia nung lir. Tanü putu nung tangar yimtem nungbo electric light tesangwa kena manen ayaba agi anü kodang adoker kodang aluar memeteter. Aji oda, item ama tesemtem nung alirtembo mapang metettsü asoshi anü adok aser anü alu merepranger saka anütettsü dang repranger mapa inyaker aser anisüngzüka agir. Ano, electric light peria alidak tajung kaji, light tesangwa tapu balala tsüklokba agi yimtiji anüngdang dangbo aonungang topur tajungba angur. Atangji, electric light ya purapiteter aser teyangluribo tesangwa asoshiang yanglur südi saka tanübo mapa ajak electric tashi agidang inyaker. Ibayongji, electric tashi ya alima nung nübortem nem mapa agütsür tulutiba kümogo. Aji oda, electric tashi amshia nisunger nüngdak osettsüset aser chiyongtsü tapu balala yangluba den ano tatsük mapang mopong temekong aser temekong mapang mopong talem ta nisungtem anisüngzüksüsa agütsüteter. Iba ama nüngdakji government nung alirtemi magütsütetra, asen lima mesüngjemtet akümtsü. Yimten yimsüsür aser ketdangsertemi nübortem jashia ain adok matatsüla saka nübortem ain madoktsüsa parnok nüngdakbosa agütsütettsüla. Nisung ajak nem government-i mapa magütsütettsü, kiojena meyanglutsütettsü aser senotsüa magütsütettsü saka electric light-bosa, angati amai atsüktsüsa, peria angutsüsa agütsütettsüla. Idangjibo, Nagaland-a lasasa renloka otettsü.

OLEMSABANG

Mapa tajung inyaker alima nung taso shizüka alitsü

~ L.Kika Pongener

(Yashi adok nungi...)

Ano tanü putu nung loktiliba aika nung lennirtemi jakdak-jakdaka tejak repranga inyakra angur. Tsüngrem o-i ashir...."Nai ochi mezütoktsüla; nai tejak mereprangtsüla; misura supokrem magitsüla" (T.Künem-16:19). Lokti nung küsa aibelen sernung, karbo shisang-shisanga tuteta aitsür aser lokti nungi agiena tezülen ayur; aser karbo tiyazü kuli agi miimbanga yutsür. Iba ama jakdak-jakdaka tejak repranga inyakraji nisung tsüngdangbo medentsü akok....Saka Tsüngrem tsüngdangbo memedentsü....Ashiko, nisungi medentsü-aka Tsüngrem-ibo merenshitsü akok. Aser ano tiyazü kuli agi aitsürtemji Tsüngremi memerenshi-i meyutsütsü. Tsüngrem o-i ashir..."Tiyazü kuli memerenshi-i malitsü; Aser tiyazü jembirji mejenbutsü" (A.Shin-19:5). Asen mimchiri asen ket nung rongsen lir; tashi (Power) lir aser nutsüng-nubu lir....ta ser tashiyim agi mapa tamajung inyakra; pei chirnur aser semchi-semnur nem atakadem bendentsür. Ano nisung karibo sen agütsür tangar dak teka yia reshikangshia merenshidaktsür....Aser aji asen teka yia inyakra masüji; nisung tsüngdangbo medentsü akok....Saka aseni inyakra küsaji asen dak aser chirnur/semchir daka inyaksüsa tensa mapangi bentsür arutsü.

Dawid chubai Uria kinungtsü Bathsheba den nukdapangta benshi aser iba mapaji miimbangtsü mechi; tongpang rara tesashidak Uria-ji yutsür tepsetdakjang ta....Sepoy tongtiba Joab dangi osang yok....Aser Joab-i Uria tongpang nung tepsetdaktsü. Ajisuaka, iba sulen Dawid'er kibong nung kechi atalok...!!!! Dawid'er kibong nung alima nung tansutsü aser maaksu mapa tulu ka atalok. Dawid'er jabaso Amnon-i tenu Tamar den nuktapangta benshi. Aser iba mechi Absalomi tenu Amnon tepset. Dawid'er kibong telung nung adianu tsüngda nuktapangta aser azü tokshi mapa atalok. Ajiser, ano Absalomi tebu den chuba menden raktepa apuso aser tebu o jabaso na tsüngda rara adok....Aser iba rara nungji Dawid-i kanga temulungtoka meima aliba jabaso Absalom tepset. Dawid-i Uria-ji pa teka yia tepset masüji....Pa-bo aibelen mali amai bilemogo sudi....Saka iba atakadem temerenshi Dawid'er kibong nung pa tenuki ngua atalok. (2 Samuel-11,13 &18).

Atangji, nisung tsüngdang temeden nguaka; Tsüngrem tsüngdangpo mejenbutsü. Asenok nisung'er yimya agi meshimejunger dak pai-bo kecha meshitettsüji ta ser ayim-ayima inyakra...Nisung aika aibelen pei sasa atakadem bendener.

Aji oda, aseni tangar kar jenjang raksatsütsü atema tasa tamajung aika asar...Ajisuaka, ashiko, aseni inyakra küsaji asen daka inyaksüsa mapangi bentsür arutsü...!!! Tsüngrem o-i ashir, "Shibai kangla tangar asoshi yanglur, pai yangluba kangla nungji pa asongtsü. Pa mapa tamajung pa dangi shilangtsü. Pa sentong tamajung pa kolak nung atemtsü" (T.Ken-7:15-16). Shibaisa kangla tudir pa idakji tsüktsü; Aser shibai lung mezüdir aji pa dangi meyiptsü" (A.Shin-26:27). Atangji, aseni inyakra mapaji tajung suaka, tamajung suaka asen dangi meyipa shilangtsü. Anungji koker ta ser tangar kanga ariokja; takokji ya adi ta....temadaki tur ajemshia meinyaksüla. Asen mimchiri aiben tanü ajung asa-a tarentak-tetsübo kecha meli-i; ken o-a tulu-lu sadem-sadema jembir; tashiyim agi mapa tamajunga temulung ulua inyaker. Ajisuaka, aseni inyakra küsaji mapang ka nung asen dangi meyipa shilangtsü....Aseni prokba metsüji kenu aseni arotsü....!!! Shirnoki ken o jembiteter ta ser tali-tapong jembir....Item chirnur aser semchi-semnurji; tia maka karbo tebang nung temeli masem, sowa-solem, matu-malem sotettsü....Tetsü-tebou aser tsüraburi ken o tali-tapong jembira; par chirnur aser semchi-semnur tejembitsü makatsü. Anungji jembiteter ta ser ken o tali-tapong mejembitsüla....Shia meteta liaka ken o karbo melangzüi ola madoki yutsütsüla....Aser mapa-a tarutsü nung tetsükdaktsü majurutsüsa kanga junga bilemdanger dang inyaksüla.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Arunachal Pradesh nung tzümetsüng agi Tenla ki ana ponger ao



July 13, 2026: Hombarnep züngia 1:00 ako meta Arunachal Pradesh nung Kurung Kumey district kübok Parsi Parlo jila nung ajungbena tzümetsüng tulu aluba mapang Parsi Parlo Town Baptist Church aser Nyishi Baptist Church Council (NBCC) indang Parsi Parlo Prayer House na tzü agi ponger ao; iba sülen ghonda ka shi lir Catholic Arogo Tenla ki ka tzümetsüng agi ponger ao.

Prayer house nung aliba printer densema osetsüset aser tongtimbang documents ajak ponger ao, ta NBCC-i metetdaksü.

NBCC-isa, Arogo joka aser kiojen den, prayer house nung staff tem aliba ki asem, chapel hall, lokti chiyungba takdang, tzü chigodak aser metsümeshidak ajak tzümetsüng agi ponger ogo, ta metetdaksü

Parsi Parlo Tenla ki-a kanga mejungi raksa aser kasa Pastoral Range nungsa tzümetsüng agi Chote Pagam Baptist Arogo Tenla ki-a kongshi.

Parsi Parlo Pastoral Range nung pastor, Rawe Mankhya-i, Tsüngrem taochi ajanga iba lendong nung nisung kata masü,

ta metetdaksü.

NBCC General Secretary, Rev. Dr. Tana Tagi Tara-i tamangertem dang kümküma alitsü, maoksaksü aser iba ama mapang nung ainlen mesenzütsü metetdaksü.

Paisa tamangertem dang Kurung Kumey district kübok Parsi Parlo jila nung alirtem atema sarasademjang, ta mepishia metetdaksü.

Kasa lendong nung Catholic Arogo- St. Thomas Tenla ki-a tzü agi ponger oadok.

Itanagar Diocese nungi Bishop Benny Varghese-i, Tenla ki mechirepdang putirtemi temeshi osettembo ajak belenadoker liasü, ta metetdaksü.

"Tanep 2:00 ako meta ajungbena Parciparlo ayong nung tzü tali metsüngbanga ayim, aser ibaji ajanga St. Thomas Arogo Tenla ki ponger oadok," ta Benny Varghese-i metetdaksü.

Paisa, Arogo school tzü agi metsüngbangogo aser presbytery den convent-a kanga mejungi raksaogo, ta metetdaksü.

2019 küm amenokba Parciparlo Parish aser Parsi

Parlo Parish na nung Catholic Khristan züngsem 1,200 dak tali lir.

Kumey ayong nung tzü metsünga ayimba ajanga sorkar office tem, Inspection Bungalow, school aser kiojen aika raksaja liasü.

Tzünglu maneni aruba ajanga district tesem balala nung anentsüh alu aser apu aika ponger oadok.

Ita ka tsüngda Arunachal Pradesh nung tzümetsüng lendong tulu asemben ataloker. Tang tashi nungbo item lendong nung nisung asüamaba osangbo mali.

Ano Arunachal nung aliba Baptist Arogo karibo tamalen anentsüh lendong atalokba mapang takoksa angurtem nem teyari agütsüdar.

Amongnü (July 12) tashi nung NBCC aser Arunachal Baptist Church Council nati tamalen Keyi Panyor district kübok Possa aser NEEPCO colony na nung tzümetsüng agi kongshiba kibongtem nem tanabenbuba teyari agütsüogo.

Baptist Arogotemi tang tashi nung sen lakh 21 lema agütsüba den külemi Baptist Associations-ia teyari balala agütsüdar.

ANOGO ABEN TSÜNGREM DEN

Aonung Sensaksem -T.Ken 77:1-6

Mapang kar ammanji asenok dak alir. Tasü mait arudaktsür, aser asenok Asaph ama akümer, shibai ashi, "Kü timtemba anogo nung ni Kibuba bushir; aonungji kwika maneni songlaa liasü; kü nelai ani mesüngzüknü" (t.2). Ne nelai animesüngzüknü dang nai kechi inyaktsü ?

Asenoki kechi inyaktsüla Asaphi ashir. Mezüngbuba, "Kü nulai, oda Tsüngrem dang kü ola agi ni Tsüngrem dang ayimtener, aser Pai kü dang angashi" (t.1). Kari ashir, kodang na aonung memejangtetlir, san azüngdang nungi, Sannüker den jembidang. Asaphi yamaji inyak.

Mapang mapang nung Kibuba dangi aotsü timtem adoker. "Ni Tsüngrem bilemtetter, aser shisa bulur" (t.3). Pa timatemtsüsa pai Tsüngrem indang kechi bilemtet? Tebilem nung ozüng ka nung tashi mangai alitsü mesüra tenangzükba ka nung arendaka alitsü. Mesüra pai Tsüngrem koda temeshi aser pa koda temenen bilemtetter alitsü.

Saka Kibuba den jembiba jagi tejangja angatetdaksür. "Ni alemli mapang, aki tendak, indang bilemdangogo" (t.5). Tanga o ka nung, Tsüngrem dak amangtsü akok. Ali mapang pai na anebalua liasü, aser na tarutsü indang pai anebalutsü.

Tanabuba, ne sasa den jembidang. "Ammang nung ni ken ken bilemtetter; ni kü mulungjang den jembir; aser kü nelai kümdanga bushir" (t.6). Kibuba indang ne sasa den jembidang. Ne taküm aser ne Khristan taküm jajaba tendangang. Ne tasü mait ken agi melentsütsü. "Ammang nung ni kü ken bilemtetter" (t.6).

Kodang na tasü meiti kümdar, ne nük meketa aliba tia nung meyiper Kibuba dak ranglokang. Ne taküma tendangang. Nai Kibuba dang tashi mangai lir asü ? Pa den jembidang aser Pai na tasü itdakjang. Idangji ne sasa den jembidang aser ne sasa Tsüngrem mapa nung tasü itang. Pai ne nem amman nung ken ka agütsütsü.

Pakistan nung Muslim nungertemi Khristantem anema longkak ait



July 09, 2026 nü Karachi n u n g Khristan, A z e e m Javaid'er kima Muslim nungertem adenshia longkak ait dang tangokba noksa nung angur.

July 13, 2026: Pakistan kübok Karachi yimti nung mejangjaba nisung kari Muslim nunger ka dangi shidi ka nung Quran kaket tapak kar den Khristan ka aser tetsü na noksa yokba sülen July 9 nü Muslim nungertemi longkak ait.

Khristantem temeden atema inyaker Asif Bastian-i, Muslim nunger temeshi kaket Quran nungi tapak teshisa kar aser Khristan ka den tetsü noksaji envelope ka nung seper Baldia jila nung aliba Waleed General Store dangi yoka liasü, ta

metetdaksü.

Envelope nungji Quran tapak teshisa kar rongtur liasü, iba denji külemi arrshi küm 40 Khristan Azeem Javaid aser tetsü na noksa liasü.

"Iba osangji prokshiba sülen Muslim nunger noklang aika Javaid'er kima adenshir longkak sashia ait. Iba tesem anasaji Khristan kibong 10-15 shi alir, anungji parnok-a kimai mayazükteti liasü," ta Bastian-i metetdaksü.

Longkak aitertem jagi police gari dak-a lung agi aon.

Tensaji azüoktsü atema Sindh Province sorkari Paramilitary Rangers den police tali yoksema liasü, ta Bastian-i osangbenertem nem metetdaksü.

"Sorkari mapang shidak nung tiyongtsüi ia inyakba ajanga lendong tulu ataloktsü aliba nokdangteta liasü. Ketdangsertemi longkak aitertem dangji, iba tatalokba ya onoki jungjunga bushisüngdangtsü aser shidi mail asüba Saddar Post Office nung aliba CCTV ajak repranga bushisüngdangtsü, ta nangzükba sülen ang longkak aitertemji süngjema liasü," ta pai ashi.

Bastian-i, ketdangsertemi police gari nung Javaid'er kibong züngsemtemji kümzüka mejangjaba tesem kati anir ao, ta ashi.

Javaid'er kinünger kati, iba ya Javaid'anema Tsüngrem mezüngmeshiba ken o benokdaksütsü mesüra pa anema lokti ajungmesotsü nükjidong nung inyakba asütsüa

akok, ta metetdaksü.

Paisa, "Javaid'ya mapa inyaker aser pai kodanga yimsü dak sendakba mangatettep nung shilem agia mali. Senotsü dak sendakba nung pa nisung kar den mangatettep liasü, anungji pa anema inyaktsü atema kari asalentong tamajung yanglua asütsüa akok. Khristan tamanger kati kodanga Quran kaket raksar pei noksa densema par ki tiplen aliba dokan kibur ka dangi meyoktsü. Shingaia pei sasa aibelen tulu inyakba memetetdaksütsü," ta ashi.

Javaid'er kibong züngsemtemji tang tashi mejangjaba tesem ka nung police-i kümzüka lir.

Khristantem temeden atema inyaker, Napoleon Qayyum-i, iba ya 2023 küm August ita nung Pakistan kübok Jaranwala nung Khristantem amakba tatalokba den mesükteper, ta ashi.

2023 küm nung Khristan adianu anati Quran kaket raksatsü, ta tena nem tai

tongloksüba sülen Muslim nungertemi Khristantem anema apusoa liasü. Iba mapang nungji Tenla ki aika den Khristantem kiojen aika rongdokja liasü.

Qayyum-isa, "Mapang shidak nung tiyongtsüi aita tensa azüokba atema asenoki Sindh sorkar, police aser Sindh Rangers dang pelatsüla. Parnoki tensa maziüktet asübo tensa kanga mejungi kümle aser Baldia jila nung alir Khristantemi dang masü saka Karachi tesem balala nunga Khristantemia timtem ajurur lila," ta ashi.

Kiyong nung alir Muslim nunger lenirtemibo, iba ya nisung kari Khristantem anema apusodaksütsü atema asalentong yanglur inyakba asütsüa akok, ta ashiba atema Qayyum-i Muslim nunger lenirtem dang pelaba metetdaksü.

"Osangbenertem senden nung Muslim nunger lenirtemi jembibaji onoki pelaa agizüker. Tangsa aibelenertemji aputsüla," ta paisa metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG****Yokya**

(n) yim anasa aliba arem tawa, lim, sonü (forest land near village)

* Yokya nung aliba süngdong tulutem melensüki wazüka ayutsüla.

Yokzük

(n) langka ka ayokba nungi aahba (sale proceed)

* Asen lu nung züsentedba züngi nungi sen aika yokzük.

OLONG PAITEP # 7565

1		2		3		4	5			
				6						7
		8								
9				10		11				
			12					13		
						14				
16						17				

TIPIEN

1. Nisung jenti - (5)
4. Tsük rudenba - (5)
6. Temzüng tesashi - (5)
8. S ___ i - (3)
9. Nisung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangtiba - (5)
17. Meputep - (5)

LANGTSÜNGLEN

1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Majinü - (5)
13. Tzüma nung senzüba - (5)

OLONG PAITEP # 7564 TELANGZÜBA**TIPIEN :**

1. Telok, 4. Aluru, 6. Ozüng,
8. Emk, 9. Kin, 10. Teti, 12. Süir,
13. Jen, 14. Ola, 16. Talak,
17. Mazük.

LANGTSÜNGLEN :

1. Tenükjang, 2. Luden, 3. Kioktsü,
5. Lenti, 7. Tajangzük,
11. Teronem, 12. Sempa,
13. Jahaz.

NAI-A YA METETTER

Los Angeles nung Belgium aser Spain tsünga FIFA World Cup 2026 quarterfinal asaya nung Spain nungi football asayar lanur Lamine Yamal-i alima otsü tasen ka yangluogo.

Arishi küm 18 tain Yamal-i World Cup asaya trokbuba asayaba ajanga "most appearances by a player aged 18 or younger in the competition" otsü yangluogo.

Longding district nung NSCN-K (Angmai) züingsem ka temai adok

Itanagar, July 13, 2026

(Agencies): Arunachal Pradesh kübok Longding district nung NSCN-K (Angmai) züingsem ka temai adokogo.

Iba nisung ya arishi küm 37 tain Pongngoi Wangnowham ta jangjaogo aser pa ya Kamkah village nungi alir.

"Honibarnü Pongngoi-i SP office nung tema adok aser idangji Arunachal Pradesh Police, 24th Assam Rifles aser Intelligence Unit ketdangsürtem liasü" ta Longding Superintendent of Police Dekio Gumja-i ashi.

Pongngoi Wangnowham-i

2005 nungi NSCN-K (Angmai) nung züingsem ka ama lia aru ta police-i ashi.

Security forces-i telungpurtem dang temai adoktsü ajungmesoa aruba nung Pongngoi-i pa sasa bendanga agütsüba ya shilem ka lir ta ketdangsürtemi ashi.

Guwahati-Imphal lenmang nung Rs 15 lakh alang cold drinks sama

Guwahati, July 13, 2026

(Agencies): Guwahati nungi Imphal-i Rs 15.47 lakh shi indang Coca-Cola brand cold drinks bener aodang samaba atema bushitepa arudang Assam kübok Cachar district nung 1,100 cartons ngutetogo.

Banskandi Police-i iba dak sendakba nung nisung ka puogo aser truck driver den nisung aika jena orr bushitepdar.

Imphal West nung amenoka aliba businessman Jagnarayan Prasad-i Guwahati nungi truck

(AS-01-K-9317) ka nung pa indang cold drinks bener yok. Ajisüaka gariji mapang shitak nung matongba agi temulung melemi bilem.

July 11 nü Banskandi Police-i Cachar district kübok Ujan Tarapur nung truck gari yutsür aliba angu. Iba osang angashiba sülen Prasad-i FIR ka benoker bushisüngdang tenzük.

Police-i osang kar angazükba sülen Hailakandi district nung tesem kar mita aodang Algapur Part-II nung Dilwar Hussain'er kidang 500 cartons yua aliba

angu.

Police-i ashiba agi Taibur Rahman-i cold drinks ji idakji yutsü saka parnok tonga maodang Dilwar Hussain aser Taibur Rahman na jena oadoker liasü.

Maneni, Boalipar Part-II nung police-isa Muktaadur Rahman Choudhury'er kidang 600 cartons angu aser pa apu.

July 12 nü Choudhury ya Lakhipur court-i anir ao aser okadaki pa anogo ananü police ket nung ayutsü temelaba agütsüogo.

Assam nung PDS kübok subsidised dal & sugar agütsütsü

1,34,237 MT

That's the amount of rice, delivered **FREE OF COST** to **appx 70 lakh** families in July

Subsidised Masoor Dal and Sugar resuming from **August 2026**

Anna Sewa Se Jan Sewa

Guwahati, July 13, 2026

(Agencies): Assam sorkar indang food security programme kübok July ita kibong lakh 70 shi ka nem angati jang 1.34 lakh metric tonnes (MT) agütsüogo ta Assam Chief Minister Himanta Biswa Sarma-i metetdaksüogo.

August 2026 nungi public distribution system (PDS) nung subsidised masoor dal aser sugar tanaben agütsüshitsü ta

paisa ashi.

"Assam state sorkari "Anna Sewa Se Jan Sewa" initiative ajanga kilen shia nem food security agütsütsü tenangzükba lir aser iba ya Prime Minister Narendra Modi mangdang ajanga ajungmesoa inyakba mapa ka lir" ta CM Sarma-i ashi.

Tan July ita Assam tesem balala nung beneficiary kibong lakh 70 shi nem jang 1,34,237

MT angati agütsüogo ta Chief Minister Sarma-isa metetdaksü.

Maneni, August ita nungi PDS ajanga beneficiaries nem subsidised masoor dal aser sugar agütsütsü ta paisa shisem.

Assam nung nüngdakba kibongtem nem food items agütsütsü atema sorkari "Anna Sewa Se Jan Sewa" programme tenzük ta paisa ashi.

MOKOKCHUNG LAW COLLEGE

Estb. 1981

LLB 3 YEARS

ADMISSION OPEN
2026-2027
ENROLL NOW



ADMISSION REQUIREMENTS

- BA OR EQUIVALENT
- 50% FOR GENERAL
- 40% FOR ST

CONTACT: 9436006243/9856386557



WELL ESTABLISHED LIBRARY



E-LIBRARY



DAILY NOTES & ASSIGNMENTS



AFFORDABLE FEE STRUCTURE



MOOT COURT

MULUNGZEN O



ASO :
25th May 1956

ASÜ :
4th July 2026

Mapang ajak nung onok akhümdong súa aliba temeim kinungbo aser Obala asür **Noklenmatong Longkümer**, Changtongya. Pa shiranga mozükitem nung jajaba mapang nungi tasünü tashi kija, kibong aser lokti shirnokisa onok mulungzürep tia nung alidang sarasadem, shisatsü, nübo aser rongsen agi onok nungita yariogo nenok ajak dangi tsüngdong marutet nung iba zülü ajanga nenok ajak dang pelaba lemsateper. Tulusang Tsüngremi nenok kija kibong aser lokti ajak moajangma.

Temeim, Kinungtsü, Chirmur, Semchir aser Kinungertem.

MULUNGZEN O



Kümsangjungba Longkümer
01.01.1931 - 09.07.2026

Arishir obala **Mr. Kümsangjungba Longkümer** (Asangma) Mapang tatsüka temang mejungi lir, iba alima nungi, 9th July 2026 anogo nung Kibubai anir ogo. Iba asüko mapang Khrista nung temeimba amangbapur tajungtem, Arogo, Yimden, lokti, kija aser Kibongtem shirnokisa nübu, rongsen aser tamang sarasadem agi onok den külemi khuret bena yaria aruogo, nenok ajak dangi ozü kinunger ajaki kanga pelabatem tsüngdong arua melemsateter, aji saka, Iba sapang ajanga molongnen o ajak den lemsateper.

Onoki nenok nem kecha meyiba magutsüteter, saka Tsüngremi nenok mapa tajungtem bilemteta moajang ni ta onoki nenok ajak asoshi sarasademtsür.

Temeimba, jala jabasotem anük apang, semchir aser kinungertem.

US aser Iran na Strait of Hormuz agi rakteper

Dubai, Chiteni/July 13 (Agencies): Hopta tatemlen Middle East tesem balala nung amakba sülen Hombarnü United States-i Strait of Hormuz ya parnoki amokbanga lir ta ashi aser Iran-ia parnoki amokbanga lir ta ashi, anungji iba rara tembangtsü asoshi tangatettep kati arutsü teimla mangur.

Oman tzükumlen strait nung Deobarnü Iran-i container ship ka nung amakba ajanga tensa tamajungba akum aser rara metenzük dang totzü tazü aser natural gas shilem 20 shi ajanga abenba tzü lenmang ya yimjung ken o jembiba nung tongtipang onük ka ta sayur. Persian Gulf nung tzü lenmang arurepa aliba nungya rara tenzükba sülen rong tem senzüba nung timtem agüja arur, kong Iran-i shishilempaba rong tem dak maka rong amshirtem amokmerener.

Iran aser US ya anogo 60 atema interim deal ka yangluba tesadang ka ajunger aser iba mapang teti asoshi rara tembangtsü atema jembishinü tenzüksü liasü. Ajisüaka strait nung maktep ang tenzuka alima nung lenirtemi Iran rara ya ano tenzükshitsü akok ta tebilemtsü akar.

"Taoba mapang ama tashi

ajak amshia rara nungbo timtem onsara tulu alitsü," ta United Nations Secretary-General António Guterres-i sangdong ka nung ashi.

US mitkar indang Central Command-i air defense systems, radar sites, missile aser drone oset aser rong tilatem densema tesem ter dak tema nung Hombarnü makogo ta ashir.

"Strait of Hormuz ya alima shishilempaba atema tongtipang tzü lenmang ka lir. Iran yangji kibur masü," ta Central Command-i ashi.

European Union lenir Kaja Kallas-ia rara metenzük dang ama strait lapoka ayutsü ayongzüka liasü.

"Strait of Hormuz ya lapoktsüla, freedom of navigation ya akumtsübotsüla," ta lai ashi.

Iran indang paramilitary Revolutionary Guard, koba linük indang theocracy nung tashi tiyongtsü ka ama par ballistic missile arsenal amshir, parnoki America indang sangdong magizüki aitsü.

"Strait of Hormuz ya ozü litsü nung lir, aser alima külen nungi kasa nisung dang alakteta timtem agütsüba aser tanur tepsetba army nem maneni ozüing alema teka

mamoshidaksütsü," ta Guard ajanga ashi.

US Navy indang 5th Fleet aliba Bahrain nung Hombarnü missile alert sirens ola asemben agüja liasü Kuwait-ia tsükchir temi akhaba nokdanger ta ashi. Linük ana nung teraksatsüba indang ola tang tashibo mali.

Jordan nung mitkari Iranian missiles pezü khazüka yok, aser iba mapang nisung asü-amaba mesüra ki o jen raksaba mali ta ashi. Jordan nungya US mitkar aser aircraft tem lir.

Iran nung ketdangsurtemi Hormozgan, Khuzestan aser Markazi provinces tem nung amakba aser iba mapang nisung ana tepsetba sorkar meyong IRNA news agency dang ashi. Sistan aser Baluchestan province nunga amakba osang iba semiofficial Iranian media ajanga ashi.

Iran nungeri Deobarnü amakba ya Bahrain, Kuwait, Qatar, Jordan aser Oman nung liasü- aser item linüktem aser Iran tsüngta tzyüim dang Strait of Hormuz ta ajar. Oman ya mapang talangka Tehran aser West tsüngta odongtar ama liasü, aser par linük amakba aitsütsü atema parnoki Iranian diplomat jaok.

(Maneni tapak 8 nung...)

Yemen sorkari Sanaa airport amak

Sanaa, Chiteni/July 13 (Agencies): Yemen nung alima kintemi agizüker aliba sorkari ashiba agi, parnok sepaitemi Iran nunger tayimtsütem manendaksütsü atema Sanaa airport makogo.

Yemen yimtiba Sanaa ya Iran den sendaktepa aliba Houthi teloki azüoker lir, aser sorkar koba Saudi Arabia aser tanga Gulf states temi teyari agütsür iba sorkar ya Aden nung amendaker lir.

"Iran-i teyari agütsüba Houthi kiralongrar teloki Yemen national tayimtsü linük yimtiba Sanaa indang airport nung anentsü nokdang, aser Iran tayimtsüi Yemeni airspace ajanga ait, anungji iba airport indang runway raksaja liasü," ta sorkari Hombarnü ashi.

Taoba mapang Defence Ministry-i nüburtem, mapa inyaktertem, diplomatic missions aser humanitarian organisation tem dang osang tejangja ka magütsü tashi iba airport aser temeket azüngtettsütsü tetuyuba agüja liasü.

Houthis puri, airport amakba atema parnoki telangzüba agütsütsü ta ashiba den kuli kecha magütsüi Saudi Arabia dak tai tonglokja liasü.

Houthi military otongdar Yahya Saree-i, "iba jenjang agiba ya memerenshibo metoktsütsü," ta amokmerenogo.

Kasa anogo Houthi purisa, Tehran nungi aruba ketdangsurtem mener aruba tayimtsü Al Hudaydah nung anenogo, ta ashi.

Houthi broadcaster al-Masirah sangdong ka ajanga ashiba agi, "Iran nunger tayimtsü ka shiranger, taolen makai aliba lisopurtem Republic of Yemen ketdangsurtemi meiner linük nung anenogo."

Sanaa nung anenba Iran nunger tayimtsü ka amakba atema iba ita tetenzüklen Houthis puri Saudi aitsüba sülen tensa mejungi kümer liasü.

Iba sülen parnoki Riyadh-i parnok indang airspace nung inyaksangshira mesüra parnok tanaben amaktsü merangra Saudi airport tem amaktsü ta amokmerena liasü.

Kasa mapang nung Yemen sorkar information minister Moammar ?bin Mutahar Al-Eryan-i ashiba agi, Houthis puri Sanaa airport nung International Committee of ?the Red Cross indang tayimtsü ka aser pilot o co-pilot sota yua lir.

Jannik Sinner-i Wimbledon Title benogo



Chiteni/July 13, 2026

(Agencies): World No. 1 Jannik Sinner-i grass court nung maneni kanga junga asaya-a Deobarnü Wimbledon final nung Alexander Zverev kokogo. Pai iba asayamung küm anabuba atonga kokogo.

Asaya nung mezügbuba set makokba sülen Sinner-i tanungba set asem ya koka 6-7 (7/9), 7-6 (7/2), 6-3, 6-4 agi asaya kokogo.

Küm ka tejakdang

Wimbledon akokba sülen Italy nunger asayar yagi tang mezügbuba Grand Slam ka kokogo. Tena tsünga final asaya ghonda asem ser minute 46 kanga toktepa asaya liasü.

Asaya nung sinner-i winners 58 angu aser unforced errors 25 dang mena liasü. Iba asaya masaya tsünga Zverev ya Grand Slam nung asaya 13 tashi khen danga tamakok mongui asaya liasü.

"Maneni final tajung ka

asayaogo. Iba atema asayar ana nüngdaker. Asaya akokba atema kanga pelar, saka künapronglai asaya kanga junga asayatetba atema tepelaba," ta Sinner-i ashi, shibai asayamung akokba atema senpet USD million 3.6 agizükogo.

Taküm Wimbledon akokba densema Sinner-i tang tashi nung Grand Slam pongu kokogo aser Carlos Alcaraz temeneper dang lir, shibai GS tenet koker lir. Maneni pai iba asaya akokba ya Grand Slam pezü nung asaya 100buba akokba liasü.

Hopta ka tejakdang Sinner French Open tanabuba round nung Juan Manuel Cerundolo-i tsükdakja liasü. Ajisiüaka Wimbledon nungbo pa mezügbuba round nung dang timtem tera ajangshia liasü. Mezügbuba round nung pai set pongu asayaba sülen Miomir Kecmanovic koka liasü.

Sinner-i taküm asaya 44 kokogo aser asaya asem nung dang tamakok ngua lir, aser asayamung trok kokogo.

Iba asaya nung tamakok nguaka Zverev-i Alcaraz ajateta pa ATP rankings nung world number two asayar akümtsü.

Stephen Fleming-i CSK coach mapa toktsüogo



Chiteni/July 13, 2026

(Agencies): Season 16 sülen Stephen Fleming aser Chennai Super Kings (CSK) na tangatettep nung pilaogo. CSK, shirnoki pa lenisüba nung IPL title pongu bona liasü parnoki iba osang ya Hombarnü metetdaksüogo.

"Franchise tenzüker tang tashi nung mapang talangba ka Stephen Fleming ya onok indang coaching unit temulung liasü. Küm metsü shi junga club den inyakba mapang pai onok maitsü, nükla yanglushiba aser temaba jenjang atongtsü atema merangba mapang teyari tulu agütsüogo. Pai bendanga agüja tejangraba tulu nung tenzüka atema Super Kings franchise kübok ajak tenüng nung onoki pa dang kanga pelaba lemsateper. Asayaba tesem nung külemi minyakaka pa ya team puti otsü nung tongtibang shilem ka asütsü," ta CSK kibur Rupa Gurunath-i ashi.

Fleming ya MS Dhoni-i kanga dang temulung alemba nisung ka lir aser tena IPL

season 19 tashi nung külemi inyakogo. Left-handed batter ya asayar ka ama IPL career tenzüker aser mezügbuba season nung CSK nungi asaya liasü.

Fleming ya CSK coach ama 2009 küm aden aser 2015 küm tashi inyaka liasü. Iba mapang CSK-i 2010 aser 2011 küm IPL atonga akok.

Fleming aser Dhoni na külemi Rising Pune Supergiant (RPS)-i ao aser IPL 2016 aser 2017 asaya. Iba mapang RPS pur IPL 2017 final tonga asaya saka final nung Mumbai Indians makok.

CSK nem küm ana tenokdangba agütsüba tembangba sülen Fleming 2018 küm head coach ama club-i meyipa aru aser iba küm ano parnoki IPL koka liasü. Maneni parnok 2019 küma final tonga assya.

2020 küm junga masayatetba sülen CSK-i maneni 2021 küm IPL akok. Ajisiüaka 2023 küm sülen CSK pur IPL nung tanabuba round tonga asaya mali.

Kohima District Inter High School Badminton asayamung tembangogo



Dimapur, Chiteni/July 13

(TYO): Mezügbuba Kohima District Inter High School Badminton Tournament July 11 nü Indoor Badminton Stadium, Officers' Hill, Thegabakha nung tembangogo. Asayamung shibangba sentong nung Advisor for School Education, Dr. Kekhrielhoulie Yhome tetushi tejaoker liasü.

Mezügbuba Kohima District Inter High School Badminton Tournament takok ngua ayongzüka atema Kohima District Badminton Association (KDBA) nem tenünsang agütsüba mapang Yhome-i, iba asayamung ajanga tanurtem nem parnok sempet sayatsü atema sabang tajung ka agütsüogo, aser badminton sayatsü atema tejangraba tali kümdaksüogo, ta ashi.

Arisihküm 9 nungi 15 tsünga aliba asayartem den jembiba mapang pai parnok dang asaya jangradema asayatsü, kati ka nungi angazükteptsü aser asayar ka tanüla ajungkettsü ajungshia liasü. Paisa, asaya aser physical activity tem ya alemli nungi lokti nung tongtibang shilem ka lir aser tanübo kanga kara renloka aoba industry ka kümogo aser südoksünema asayatsü aser professional career atema-a maongka agütsür ta ashi. Pai kaketshirtem dang, school, state aser linük tenüng nungi national aser international jenjang nung asayatsü atema bendanga agüja meranga inyaksü ajungshi.

Advisor-isa, Nagaland nung stadium tasentem yangluba den tang aliba facility tem yanglushia

asayartem nem maongka agütsütsü atema sports infrastructure akangshitsü asoshi sorkari merangdangba indang metetdaksü.

Sentong nung KDBA Vice President (Technical), Meguokho Pienyü-i asayamung indang osang agütsü. Pai iba asayamung nung school 12 nungi asayar 57-i shilem agia tetoktepa ajanga parnok tejangraba, temulungtetba aser sportsmanship sayuogo, ta ashi. Paisa, lanur asayartem nem parnok sempet arangtetsütsü atema maongka agütsütsü aser asaya ajanga yimayimpong tajung sübadaksütsü aser kasa mapang nung district nung badminton asaya ajungkettsü nükjidong nung iba asayamung ayongzüka agiogo, ta ashi.

US aser Iran na Strait... (Tapak 7 nungi...)

Ano Hombarnü Kurdistan Freedom Party indang armed wing meyong base ka nung amak. KFP ya Iranian Kurdish opposition telok ka Iraq indang semiautonomous northern Kurdistan region nung amenoka lir. Kurdistan Militia Corps indang commander Rebaz Sharifi-i ashiba agi, par telok indang Chamshar base nung tenük uoker amak, saka nisung asüamaba mesüra ki o jen raksatsüba indangbo mashi. Telok katia tenüng agia mali.

Deobarnü US mitkari ashiba agi, parnoki missile aser drone khaloktsüba tesemtem, ammunition dumps, communication equipments aser tanga tesemtem densema targets 140 nung amak - koba taoba hopta anaben amakba dang nungi kanga agi tesashiba alitsü.

"Yasüng onoki parnok dak bomb pokloktsü," ta US Tir Donald Trump-i NBC indang "Meet the Press" nung ashi.

Iran-i tayang kepzüka region nung US mitkartem aliba

linüktem nung amak aser par kisüingi strait azüoktsüla ta nenshia ashi.

Iran-i strait ya shibangogo ta ashir, saka US mitkar aser Trump-ibo strait ya lapoka lir ta ashir.

Iran-i strait alenbangba ya tera salaogo, kechiaser Oman tzükumlen senzüba rong tem nem US mitkari teyari agütsür. Lenmang tasenba yagi Iran ain adoker aser iba lenmang amshiba rong tem dak aiben makogo.

Iran-i strait soita ayuba ajanga alima nung totzü tebilemtsü adok.

Iran indang Foreign Ministry odongtar Esmail Baghaei-i Mideast nung mepetmesü adokba atema Washington tenüng asener.

"Memorandum of understanding indang fourteen clauses ya repringdangra. America nungeri iba mapang tatsüka tsünga lenmang ka mesüra ka nungi components aika tepsetogo," ta Baghaei-i osangbener dang Hombarnü ashi.

BILEMDANGANG

"Na agi temulung sür liang."